

Мае малпаз — быдэстоз

Выль ар азын «Удмуртия» издательствоын «Герои спорта» книга потыз шаерысьтымы сйё-дано спортсменъёслэн тусъёсынызы. Соосты суредаз Ижысь техника кун университетесь доцент, мугорез кыдатон культура удысьы дано ужась Эмилия Юферева.

Книгаен тодматскон Йёскалык библиотекаын ортчиз. Ужрадэ люкаськызы Эмилия Гавриловналэн матысь эшъёсыз, вордскем Дэбес ёросысь тыз куноос: ёрос администрациен кивалтйсьлэн воштйсь Леонид Иванов, эшъёсыз Валерий Сунцов но Вера Казакова.

Эмилия Гавриловна — туж аспортэм адыми. Кылем арын солы 80 арес тырмиз. Дэбес ёросысь Вуж Заногуртын вордскемын, собере Тыловайысь нылпи юртын, Уйвай-Медло гуртын, Дэбесын



Ижысь Эмилия Юферева «Герои спорта» книгаеныз тодматйз.

но Кезын улэмын. Пичи дырыз туж курадъыса ортчиз.

Соин ик дышетскон сярсыс оз малпаскы, Ижысь заводэ

ужаны интыясыкиз. Чертёж лэсьтыны быгатэмзэ шодйзы кивалтйсьёсыз, дышетскыны ыстызы УдГУ-ысь худграфэ.

Студент арьёсыз но сёкытэн сётскизы. Коньдонлы ёрмон вуттйз сое спортъя секция: великен ворттылиз, конькиен бызъылиз. Угось спортэн эшъяськисъёсты дунтэк сюдылызы. Көнъя ке ар ортчыса, Эмилия Юферева великен ворттылонъя но конькиен бызъылонъя СССР-ысь спортъя мастер луиз. Озы ке но сюлэмызлы матын вал суредаскон но архитектура. Отйаз со Ижысь техника кун университетесь «Архитектура» кафедраын ужаз.

Ваньмон дыръяз Эмилия Гавриловна суредаскыиз, ужъёсыныз адзйтонъёс радъялляз, валтйсь геройёсыз — шарысьтымы спортсменъёс но соослэн тренеръёсы. Соосты акварелен суредалляз. Нырысь ик «Имена» альбомез поттйз, 2013-тй арын — «Герои

спорта Удмуртии» книгаез, 2021-тй арын — «Герои спорта» книгаез. Берпуметйез 800 экземпляр тиражен печатламын, 129 бамъем книгае 100 пала портретъёс, Олимпиада сярсыс гождямъёс пыртэмын.

— Синъёсы ляб адзйны кутскемен, берпуметй суредъёсме сюлэм шодэмея лэсьтй, — шуэ Эмилия Юферева. — Тус пуктыны пормытэмелы шумпотй. Али синъёсы адзёни — операция лэсьтй.

— Эмилия Гавриловна — юн сямом кышномурт, мае малпалоз, сое ик быдэстоз, — шуэ Ижысь механика заводын чош ужам эшез Галина Корепанова. — Книга потгон сярсыс со дасо арьёс пала вералляз, көнъя со бордын ужаз, паймоно чиданлыкеслы. Милемлы но эрик уг сёты — нуналлы быдэ бызъылыны потаськомы.